

մնահարուժյան, փոխվել է մի բարձր սյան: Այդ սյան գլխին պառկած է մնացել պալը, տալով ամբողջ սյունին մի հսկայական սեղանի տեսք: Սարահարթի այս արևելյան հատվածում աղբյուրները բխում են ձորերի հատակին մոտիկ շերտերից, և գյուղացի աղջիկը ջուր բերելու համար ստիպված է շատ ներքև իջնել և ծանր կուժն ուսած՝ ձորի գրեթե զառիթափ կողով բարձրանալ: Միայն մի տեղ ջրերը դուրս են պոծել ավելի բարձր կետից: Դա Գորիսի գետահովտի Ակներ (հին Վարարակն) աղբյուրն է, որի ջուրը 932 թվին Տաթևի վանքի վանահայր Հակոբ եպիսկոպոսն իր կառուցած անով ստարել՝ հասցրել էր մինչև Որոտնա ձորի մեջ վանքին պատկանող Յաթուտ կոչված հողամասը՝<sup>1</sup> այգիները ջրելու համար: Այժմ Ակների ջուրը տարված է խողովակներով Գորիս քաղաքը:

Հակառակ լոռի գավառին, որտեղ գյուղերը խույս են տալիս Դերեզ գետի ձորից և զետեղված են նրա քարագլխին փովող տափերի վրա, Բուն Զանգեզուրի գյուղերը խորը մտնում են ձորերի մեջ և կաշում նրանց կողերին: Այսպես Որոտան գետի ձորի ձախ ափին իրար քովիքով ծվարած Հալիձորը, Շինուհայրը (Շնհհերը) և Խոտը, իսկ նրա ձախակողմյան վտակների ձորերում՝ Գորիսի գետահովտում հին Գորիս գյուղը և Վերիշենը (Նրիշենը) և Քարահունջը, Խնձորեսկը և Չորաշենը (Գերուն, Գորուն, Կյորուն)— նույնանուն ձորերում, քարաշեն Խնածախը, Տեղը, Հագարու գետի վտակների ձորերում: Այս գյուղերում տների մի խոշոր մասը ծիծեռնակի բնեթի պես ծեփված է ձորի կողին առանց որևէ կանոնավորության՝ քմահաճ ելևէջ շափիղներով իրար հետ միացած: Նրանցից շատերն իրենց ետևի կեսերով խրվում են մայր ժայռի մեջ, որպես քարայրներ: Կան և ամբողջովին քարայր ներկայացնող բնակարաններ՝ քրատակներ: Այս տեսակետով առանձնապես հետաքրքրական է Խնձորեսկը, որտեղ տները խումբ-խումբ կուշ են եկած այս կամ այն լեռնախորշում՝ մեծ մասամբ ազգակցական անցյալով իրար հետ շաղկապված: Այդ պատճառով Խնձորեսկի թաղերն և երբեմն իրենց ամբողջունները կրում են մեծ մասամբ տոհմական անուններ<sup>2</sup>: Նեղ, մեկ վեր, մեկ վար, երբեմն աջ, երբեմն ձախ, մի տեղ ժայռի գլխով, մյուս տեղ հարևանի կուտրի վրայով կենող իջնող շառավիղների ցանցը կարծես գրկել կպցրել է ձորի ժայռոտ կողին գյուղի քարե, փայտե, կավե գորշ զանգվածը, այս ու այնտեղ բացվում են քրատակների բերանները և երբեմն կանաչին են տալիս հատ-հատ ծառերի փոշոտ սաղարթները:

Նույնպիսի քրատակների կուտակումներ են Խնձորեսկից ավելի լայն ձորերում ծվարած Գորիսը՝ հին գյուղը, Տեղը, Խնածախը, որոնք համեմատաբար նոր ժամանակներում են դուրս եկել ձորերի խորքից, բայց այդ գյուղերումն էլ տեղի նեղվածությունը հարկադրել է անասնապահական շենքերը՝ զամէրը, մն-

<sup>1</sup> Տաթևի եպիսկոպոսը ջուրը գնել էր Սյունիքի տեր Փիլիպպոս իշխանից, վճարելով 12 հազար դրամ և մի պատվական գոհար ու մեծ ծախքով և աշխատությանը առուն պեղել՝ անեծքով արգելք գնելով Հալիձորի, Խոտի, Շնհհերի և Նորի գյուղացուց՝ այդ ջրից օգտվելու: Այդ առուն 1292 թ. նորոգվեց Հովհաննես արքեպիսկոպոսի ջանքերով: Դրա մասին հիշեցնում է անվի կողքին բնական ժայռակերպի վրա փորագրված արձանագրությունը: Այդ առուն ժողովուրդը կոչում է Քէշիշ-արխ-Քանանայի առու: Ցաթուտ վերանվանվել է Վարդուտ: Տե՛ս Օրբելյան Ստ. անդ, գլ. ԽԹ և Ե. Լալայեան, Միսիան, էջ 39:

<sup>2</sup> Արշանց, Կատվանց, Բրդանանց (Բրդանի՝ դղում), Բոզունց ձոր (Բոզ՝ սպիտակավուն), Դաղալունց բերդը (որտեղ սպանվել է Մխիթար սպարապետը), որի դիմացն է Ջանունց բերդը: